



Iesus ieusna quarante iours & quarante nuits au desert ; est tenté par Sathan, qui est enfin rendu confus.

POUR donner racine à la parole de Dieu, que Iesus vouloit annoncer au peuple d'Israël, il ieusna quarante iours & quarante nuits au desert, & eut finalement faim, occasion que le Tentateur s'approchant de luy, luy dit : Si tu es le Fils de Dieu, commande à ces pierres qu'elles deviennent pain. Iesus respondit : Il est écrit, l'homme ne vivra point de pain seulement, mais de toute parole qui procede de la bouche de Dieu. Adonc le Diable le transporta en la sainte Cité, & le mit sur le pinnacle du Temple, & luy dit : Si tu es le Fils de Dieu, iette toy en bas, car il est escrit, Il donnera charge de toy à ses Anges, & te porteront en leurs mains, de peur que tu ne heurtes ton pied à quelque pierre. Iesus luy dit derechef, Tu ne tenteras point le Seigneur ton Dieu. Derechef le Diable le transporta sur vne montagne fort haute, & luy montra tous les Royaumes du monde, & leur gloire, & luy dit ; Je te donneray toutes ces choses, si te prosternant en terre tu m'adores. Dont Iesus luy dit, Va Sathan, car il est escrit, Tu adoreras le Seigneur ton Dieu, & à luy seul tu seruiras. Alors le Diable le laissa, & voicy les Anges vindrent, & le seruirent.

S. Matthieu Chap. 4. S. Marc Chap. 1. S. Luc Chap. 4.